

Na temelju članka 62. stavak 5. Zakona o veterinarstvu ("Službene novine Federacije BiH", broj 46/00), federalni ministar poljoprivrede, vodoprivrede i šumarstva donosi

## **PRAVILNIK**

### **O IZMJENAMA I DOPUNAMA PRAVILNIKA O UVJETIMA ZA UVOZ SJEMENA ZA VJEŠTAČKO OSJEMENJIVANJE ŽIVOTINJA I OPLOĐENIH JAJNIH ČELIJA I NJIHOVOJ UPORABI U STOČARSTVU**

#### Članak 1.

U Pravilniku o uvjetima za uvoz sjemena za vještačko osjemenjivanje životinja i oplodjenih jajnih ćelija i njihovoj uporabi u stočarstvu ("Službene novine Federacije BiH", broj 4/01) u članku 12. stavak 2. briše se.

#### Članak 2.

U članku 14. riječi: "odnosno krajnji korisnik" brišu se.

#### Članak 3.

Iza članka 17. dodaju se novi čl. 17a. i 17b. koji glase:

#### "Članak 17a.

Uvoznik, odnosno distributer sjemena za vještačko osjemenjivanje životinja i oplodjenih jajnih ćelija mora ispunjavati sljedeće uvjete:

a) da u radnom odnosu ima najmanje jednog uposlenog doktora veterinarske medicine, pod čijim će se nadzorom vršiti manipulacija sa sjemenom za vještačko osjemenjivanje životinja i oplodjenim jajnim ćelijama;

b) da objekat posjeduje prostoriju za karantin pošiljki iz uvoza sukladno Pravilniku o uvjetima karantina za uvezene životinje ("Službene novine Federacije BiH", broj 48/99);

c) da posjeduje prostoriju za skladištenje sjemena za vještačko osjemenjivanje životinja i oplodjenih jajnih ćelija, koja je funkcionalno povezana sa prostorijom sa sanitarnim čvorom;

d) da u objektu posjeduje uvijek dovoljnu rezervnu količinu tečnog azota, neovisno o prisutnoj količini sjemena za vještačko osjemenjivanje životinja i oplodjenih jajnih ćelija, najmanje u količini od 100 litara;

e) da u objektu posjeduje odgovarajuću opremu, odnosno mikroskop i prateću opremu za utvrđivanje pokretljivosti spermija, pincete, kompjuter i drugu neophodnu opremu za manipulaciju sa sjemenom za vještačko osjemenjivanje i oplodjene jajne ćelije;

f) da imaju sredstva za održavanje opće i osobne higijene (sredstva za dezinfekciju) i sredstva za pružanje prve pomoći i uklanjanje otrova (dekontaminacija).

Odredbe iz točke b) ovog članka odnose se samo na uvoznike sjemena za vještačko osjemenjivanje životinja i oplodjenih jajnih ćelija.

Prostorije iz stavka 1. ovog članka moraju biti izgrađene tako da su građevinsko-tehnički prikladne za lako čišćenje i dezinficiranje, te sigurno manipuliranje materijalom.

#### Članak 17b.

Pravne osobe iz članka 17a. ovog pravilnika mogu vršiti djelatnosti uvoza i distribucije sjemena za vještačko osjemenjivanje životinja i oplodjenih jajnih ćelija samo uz odobrenje Federalnog ministarstva poljoprivrede, vodoprivrede i šumarstva."

Članak 4.

U članku 18. riječ "Podnositelj", zamjenjuje se riječima: "Uvoznik, odnosno podnositelj".

Članak 5.

Članak 19. mijenja se i glasi:

"Uvoznik, odnosno distributer dužan je voditi evidenciju uvezenih i distribuiranih pošiljki, na slijedeći način:

1) za uvezene pošiljke:

- naziv proizvođača i zemlja podrijetla;
- broj doza,
- pasmina,
- laboratorijski nalaz ovlaštenog laboratorija (pozitivan oznakom "+", a negativan oznakom "-");

2) za distribuirane pošiljke:

- naziv kupca i adresa;
- broj doza,
- pasmina,
- pojedinačna cijena doze."

Članak 6.

Poglavlje "**Prijelazne i završne odredbe**" briše se.

Članak 7.

Ovaj pravilnik stupa na snagu narednog dana od dana objave u "Službenim novinama Federacije BiH".

Broj 03-24-101-1/04  
travnja 2004. godine  
Sarajevo

Ministar  
**Marinko Božić**, v. r.